

四庫全書

史部

欽定四庫全書

史部

陝西通志卷五十七上

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官助教_臣胡予襄

謄錄監生_臣吳之承

欽定四庫全書

陝西通志卷五十七上

人物三

廉能

明

潘友直字孟舉澄城人洪武初由茂材舉從太祖克陳
友諒屢畫奇策陞工部尚書所至輒有聲績習儉服
勤終始一節後乞骸骨朝廷寵賜金帛歸邸悉賞軍

士同妻驅驢而歸行李蕭然惟圖書數卷而已

賈志

柳申漢中人洪武初拜大名太守為政務推經術尚德

緩刑郡人至今首稱之

畿輔志

齊原芳乾州人洪武初為郾城縣丞元末兵燹民皆竄徙原芳繕城邑修室廬勸農桑通商賈流民間風歸

附邑以富庶

河南通志

張統字昭季富平人父月川文行知名統才識通敏洪武間由明經舉歷雲南右參政晉左布政使凡雲南

土地貢賦法令條格悉經裁定洪武三十年入覲考

最為天下第一

張芹備
遺錄

建文即位召統為吏部尚書

時旁求遺逸會集闕下統鑒識精絕用當其才試編

修實錄官得楊士奇奏為第一靖難兵起錄朝中奸

臣二十八人統與其數赦為尚書如故上簡建文羣

臣因解職務月給半俸居京師統退自經

名山
藏

吳偉南鄭人領洪武甲子鄉薦知茂州多善政羌人懷

服累官四川左布政使

明一
統志

李昶字文焯涇陽人自少敦重孝友刻志向學領洪武丙子鄉薦歷官至戶部尚書凡儲蓄貢輸戶稅增損金帛出納皆調度規畫有法所得不少留頒賜姻族

比卒家無餘貲

雍大記

李暹長安人洪武中舉於鄉永樂初授戶部主事使西域踰萬里至撒罕馬兒凡五往返不辱君命遍歷諸國皆能得其懽心朝廷嘉之歷仕戶部侍郎後又有高引先者亦長安人由進士官行人使朝鮮及境有

使來迎稱曰館伴引先改為迎候得上國體歸朝授

御史巡方所至發奸摘伏若神終四川參議

賈志

張毅安塞人洪武間以人才任廬州知府不挈妻孥止以一僕自隨布衣糲飯人不堪其苦毅處之裕如其

清介近世罕有

延安府志

李著郿縣人太學生洪武中任御史明清有為勤慎自

持吏民無不服

賈志

甄儀麟遊人舉人初任主事歷順天府尹兵部左侍郎

清白之操始終不渝孫希賢官御史按雲南河南揚

清激濁風裁卓然陞知府未任卒

馬志

周道朝邑人以舉人官御史征雲南時總兵餽貨寶幾

千金道一無所受時稱其廉擢山西參政有惠政卒

於官喪出民遮道哭奠三日不得行

朝邑志

馮進藍田人以人才授貴州道監察御史巡按山東陞

四川按察僉事兼督學道衡鑑澄清轉河南屯田僉

事抑豪強辨疑獄人擬之包拯後丁憂廬墓卒

馬志

王攻郿州人洪武中舉人任懷慶府同知清潔自持有
勸以置田宅者攻叱之歸里後囊無餘財篋中惟書

籍數十部

賈志

楊榮宜君人洪武時以人材任郿縣丞廉慎清正政聲

卓然永樂元年旌異

宜君志

何回鳳翔人以太學生知郿門縣誠心實政惠義丕著

歷遷山西右參議廉勤自持始終不渝

鳳翔縣志

宋詡膚施人洪武中舉孝廉歷官有聲後累遷應天府

尹

明一
統志

高懷敬延川人洪武中以人材起家歷官有能名累遷

湖廣按察副使

明一
統志

楊瑞鳳翔人洪武間以貢知墊江縣積穀二萬石市牛

千隻民無力者給之植道旁柳千株以休行者

四川
總志

胡貞岐山人由舉人任永和令邑素荒殘貞至捐俸買

牛種治耕具教民樹藝後擢知應州改廣德俱有循

聲

馬
志

何福全鳳縣人洪武間以人材任縣丞有治聲陞威州

知州威惠兼行蠻人信服擢四川左參議

馬志

權士安字惟寧澄城人洪武中由人材授南樂令至則

詢民疾苦勸課農桑修葺城郭祠廟百廢畢舉政暇

作興學校文風丕振

澄城志

張綱米脂人以國子生擢江西南康府照磨盡心於職

後累遷四川按察副使

明一統志

王思吳堡人洪武中以國子生擢嘉興同知調揚州所

至有聲後陞四川右參政

明一統志

王琰字廷玉鄆縣人由貢士授太寧令太寧民散處山

中愚戇負固琰與約令自至為平其獄訟賦役俾各

得所再補長清令吏舞文為患琰黜老吏三四人其

患頓除治行為山東第一

馬志

王蚤字克修郿縣人洪武末監生授蘇州府同知蘇賦

甲他郡期年逋負皆完累陞工部尚書京師城垣外

輒內土雨久輒壞蚤督理純甃之正統中以王振用

事致仕蚤用嚴峻為治卒無字

名山藏
葉盛傳

龐惟方延安人洪武間為臨海令為政平恕折訟均徭

民胥悅服

賈志

張賢字思齊鄠縣人永樂乙酉舉鄉試授吏部司務陟

驗封司郎中剛廉自持部中呼為板張超拜山西右

布政使威惠並流遠近悅服尋乞歸舊廬數楹僅庇

風雨

王九思
撰墓碣

趙倫邠州人永樂乙酉舉人宣德中歷官職方郎中有

聲陞戶部侍郎巡撫浙江左遷河南布政使卒於官

倫持身廉潔蒞事嚴明人不敢干以私

明一統志

李敬臣鳳翔人永樂中以材能卓異薦於朝歷官有聲

累遷刑部右侍郎

明一統志

艾瑛隴州人恩貢永樂中舉人材授浙江右布政使才

能著稱

明一統志

杜崇字善政三原人剛毅寡合舉永樂丁酉鄉試任真

定通判正統中靖邊伯王驥征麓川陞職方郎中參

贊戎政復調南京戶部所在得大體南部堂後樹忽
冬花衆譽其瑞棠正色曰冬花春秋書異何瑞之有
其剛正類此性至孝母喪廬於墓側後陞雲南知府

政績著聞致仕

賞志

賀琳宜君人洪熙元年任浮山縣丞時有逋稅捐己俸
並勸富家助償自是流民復業以優治聞及憂去民

泣送塞道

馬志

許璞鳳翔人宣德丙午發解授學官正統六年薦陞仁

和知縣公平廉慎輕徭薄賦民懷其德卒於官貧無
以殮民爭賻以助葬仍為木主於本縣祀之

萬姓
統譜

連俊邠州人宣德初舉人材任崇明令邑田多圯於海
而民猶償租俊力奏免癸丑歲蝗請以菽麥代秋賦
軍民俱賴之明年復大祲借常熟官糧數萬石以濟

所活甚衆

萬姓
統譜

董鼎同州人宣德壬子舉人歷海州知州惠政浹人改
知膠州勸農桑興學校旱禱輒應人頌神君聞風歸

附者二千餘戶

賈志

盧彬字文質咸寧人宣德中進士授戶部主事時朝命將伐麓川以彬督餉規畫得宜貴州苗叛彬擒賊首餘皆奔潰水西寇為亂彬單騎往諭蠻民感化貴地

以寧轉山西參議

咸寧志

李善字元吉岐山人正統己未進士初知黎城黜嚴峻尚寬平獎孝行勵耕織遷知汾州民間有到底清之

謠累擢四川參政告歸

賈志

陳厚乾州人以舉人知重慶府明於照物敏於治事時

稱能吏

賈志

王璽字廷用藍屋人正統辛酉鄉魁任武陟訓導躬為

講解督課士習丕變文教大興後遷武陟尹歲歉多

盜設法賑貸盜賊衰息擢監察御史抑橫除奸風聲

赫著遷永平知府調襄陽撫恤流民以數萬計後致

仕歸子傳字良弼成化乙未進士歷官鄖陽知府陞

四川參政所至有績時稱父子濟美

賈志

郝安字居中清澗人正統甲子舉於鄉任萊州府通判
以邊才擢守遼東安樂調守鎮寧有治績子志義成
化己丑進士授評事進寺副奉命審錄河南時方天
旱志義定疑獄三十五人釋無辜者三百七十人取
服罪者十人戮於市天即雨厯右副都御史巡撫湖
廣尋卒志義素性嚴毅持已處人循蹈矩矱所至以
廉慎稱賈志子序字宗殷弘治辛酉舉人志義卒序聞
訃趨奔哀毀骨立潘梟以金賻却弗受扶櫬歸援例

乞祭葬逆瑾素銜志義不附已遂矯詔下獄尋謫戍瑾敗授高唐守高唐民悍序嚴明仁恕豪猾斂跡終順德府同知名宦序曾孫由進士歷南少司馬忤權

璫罷歸

賈志

宋欽字克敬乾州人正統乙丑進士授大理評事審錄罪囚必參駁求至當陞福建僉事遇疑獄尤盡心推鞠廉察奸墨罔有遺漏遷河南按察使持憲愈嚴俄遷右僉都御史巡撫貴州建學立師大興教化鎮守

太監鄭鍾病故欽建言官多則民病貴州地狹而簡
乞免差內臣鎮守不報尋陞南大理寺卿數辨疑獄
人皆稱平致仕卒

王恕撰
墓碑

李儒王瑾俱涇陽人儒以監生令鄒平有貴戚奪民田
儒奏聞歸田於民後知蘇州築堤四十里以障水患
民為立祠瑾以舉人任安平黥盜誣良瑾釋其枉植
柳萬株以便行人時稱為召棠之蔭

馬志

張文質字時中扶風人景泰庚午舉人知澤州輕徭薄

賦舉廢釐弊凡愛民者無不為之轉順天治中擢漢陽知府六載多惠政時權閹以文質同鄉里期一見卒不往遂罷歸

賈志

郭瑾字良玉華州人景泰庚午舉人磁州知州施德育民民以無訟尋守蓬州歲大饑請賑院司牽制舊例不許瑾泣曰吾所育者天子之民也獨不能告天子耶遂聞上得賑蓬民賴焉九年入覲蓬民隨赴闕借留以疾致仕

賈志

王俊字世傑邠州人景泰庚午舉人知蒿縣屏貪吏恤
貧乏嘗濬順陽濟民二渠灌田百餘頃邑人賴之

河南

通志

劉介字師惠清澗人父鏞景泰癸酉舉人歷長沙知府
折獄有聲他郡咸請就讞再補登州晉參政益勵清
操終始一節介中弘治癸丑進士由吏曹出守撫州
撫多商販引價吏胥以舊留三分之一白介介叱之
人服其廉逆瑾黨人李璫大索江南諸郡介獨不應

瑾深銜之然卒無以中傷陞太常少卿終養歸子維
禴字子孚正德間中進士知滑縣武宗南巡道出滑
維禴從容經理百役立辦滑素健訟維禴以德意感
孚訟獄衰息歲饑蠲賑全活萬計始黃河故道經滑
民歲費金錢治河後河南徙封丘徵錢如故維禴罷
之擢御史上疏皆切中利弊卒於官介孫大觀由舉
人知孝義縣歷登州同知所至有惠政終趙王府長
史賈志士麟大觀子萬歷丙子舉人授定襄令前令白

璧亦清澗人也闢地招民省冤釋枉為一時良吏麟
故出璧門下素悉定邑利弊至則修明政教潔己惠
民論者謂不負親師遺訓焉

綏德志

邢簡字居敬咸寧人幼聰穎嗜學景泰甲戌進士授刑
部主事用法明允為尚書所重凡大獄多委鞫焉陞
真定守嚴明憲度祛弊均徭吏畏民服陞浙江參政
時江海泛溢簡賑饑蠲稅又築堤設閘民賴以安後

陞戶部右侍郎

馬志

劉傑字世英高陵人景泰五年進士授戶部主事遷知
湖州府湖民尚訟傑盡滌誣冗譎誕之習而示以禮
民遂靡然向風明年上歲幣官屬語存餘為出納之
圖傑曰吾安可割民以奉勢乎執事者大怒退幣六
十餘足効不職左遷同知真定尋知永平府屬縣富
民有巡校以盜誣者官府知而不爭傑得告即發執
之其衆果遁傑因此中傷去

馬志

田濟麟遊人景泰甲戌進士由江西奉新令擢侍御按

浙江抑豪右辨疑獄有引裾折檻之風

麟遊志

濟守真

定甫下車即革吏弊察民隱明年夏秋瘟瘡交作濟施藥療疾給棺葬屍歲荒不待上報開倉賑濟全活無筭挫戚畹之勢釋盜誣之寃境內大治

畿輔志

白惟勤字勉之清澗人景泰中舉人仕沁州知州加意撫循廉潔自勵獄訟明察能得隱情陞衛輝通判沁

人立祠祀之

清澗志

閻本字宗元邠州人景泰甲戌進士初任薊州倉儲出

納平允吏無敢為奸擢僉都御史撫薊門舉修平谷
豐潤玉田開平諸城池通薊浮橋悉加繕構有貂璫
怙權掾史舞弊本盡法處之因是被讒稱疾致仕久
之復起為戶部侍郎畿輔志驤字伯仁本之子弘治辛
酉舉人歷刑部郎中為秋臺倚重後守太原致仕卒

邠州

志

楊祥寶雞人景泰丙子舉人任四川重慶府通判陞夔
州府同知廉介有為剛毅不阿人號青菜楊又岳池

主簿丁巘者陝之鳳翔人以清謹自矢方病篤有犯

法者饋暮夜金巘固却之時以為難

馬志

王彝鄂人由舉人同知解州廉慎剛斷百姓呼為鐵王

遷代州卒

馬志

榮清字元潔藍田人天順初以材品授內府甲字庫大使職司金幣出納惟謹遷山東昌樂縣主簿昌多逋賦前官峻急有鬻妻子以輸者清寬限理之由是宿負漸清嘗署益都壽光篆二縣亦大治予華號雙溪

成化辛丑進士初任鞏令鞏治與溫縣鄰田稼每為
溫民所刈鬪傷者衆華築堤堰水界之爭端以息改
嵩縣弭盜安民教化大行丁外艱服闋補無錫邑有
四虎為害祝而捕之一日獲其三其一復自至民相
謂曰猛虎猶知約束況吾民耶後為御史巡按兩淮
四川所至除奸革弊稱為名御史子察弘治丁丑進
士除山西夏縣令興學勸農有古循良風歷貴藩左

參議治聲赫然

藍田志

員賢咸陽監生天順間任溧縣令初建水次倉留心學

校

溧陽縣志

孟俊咸寧人天順己卯舉人知上杭縣為治嚴而有則
理禁剔蠹威行惠流吏畏而民悅之擢監察御史巡

按南畿以布政司參政致仕

萬姓統譜

申瓊字廷瓚三原人天順己卯舉人任山東蒙陰令嘗

集古昔孝順事實為民講解又督治農器以溥耕鑿

之利教養兼舉蒙人繪像祀之

趙應元撰墓表

王政字尚德扶風人幼遇異人自經史外旁通天文兵
法天順壬午舉鄉試任蘭陽令復補威縣摘奸剔蠹
平賦均役多異政陞澤州同知再補遼州前後二十
年清慎質直不渝其節俱祀名宦致仕歸子孫不免

貧窶

賈志

宋賓字大賢中部人精易學舉天順三年鄉試甲申當
會試不赴公車曰必有火災已而果驗授陽曲令博
詢民隱抑制豪強陞知陝州歲饑飛蝗布野賓竭誠

步禱明日羣鳥來食殆盡陞南京中軍都督府經歷

同里寇恕亦通易理以舉人任綿竹令有廉聲

延安府志

韓倫字秉彝朝邑人天順壬午舉人授武清知縣武清

地近畿輔軍屯皇莊徧四境最稱難治時中官梁昉

貴震朝廷牧馬斯地威焰百端倫不應昉怒縛里正

懸高竿以示曰知縣見此否倫亦擒昉頭目竿懸之

曰釋里正則釋頭目昉不得已釋之昉至京言倫不

稱狀遂罷歸自是杜門不出縣尹某欲致之不得適

倫子繼宗應里長役尹故苦之以致倫倫曰彼縣官
苦里長我何與焉竟不見尹悔言之分守車平章平
章曰尹誤矣致賢豈以威力為哉率尹踵門請至再

三始一見云

范洛集

馮寧同官人父貴宣德時以平漢功官鹽井提舉寧登
成化二年進士歷四川僉事統芒部諸土官地甚險
遠往時上官無一人至者寧攀木緣山親履其地躬
行化導土司畏而懷之後正德中有洛川張文奎者

亦以僉事道備兵川南時芒部弗靖邊人互相煽動
文奎結以恩信邊人感悅卒不煩兵而定文奎歷仕

山西左布政使廉名特著

賈志

紀溫字宗直綏德衛人成化乙酉舉人榆林衛地近邊
人鮮知學余子俊為巡撫奏設衛學官以禮聘為師
溫規格嚴整經指授者多成立謁銓授吏部司務士
無問識不識皆知有紀司務陞太僕寺少卿綜理周
密咸中條節不避勞勩卒於官

賈志

雍泰字世隆咸寧人幼苦學成化五年進士銓吳縣知縣吳中田傍湖悉淪湖漲前尹欲堤之阮富室不就泰舉前事竟成之號雍公堤入為御史初巡南城後巡居庸紫荆二關及巡鹽兩淮已陞知府余子俊總督宣大舉為山西兵備副使千戶韋瑛誣收謀逆百人子俊將坐實上奏泰曰人命至重其可輕耶疑讞可予俊從之至京果俱免泰剛直有時名然行事時涉下屬民有罪或杖至死太原知府告泰杖人至死

狀收下錦衣獄刑部讞當酷刑罷官刑部郎韓紹宗
走見王恕曰泰直臣公可避鄉曲嫌坐視耶降湖廣
參政弘治初陞浙江右布政使十二年為右副都御
史巡撫宣府諸所奏議咸當時務參將李稽李東陽
姪也為部下所告泰將奏治之稽跪請受責度泰必
見寬泰令縛下擊以大杖科道官承東陽意劾泰擅
杖將官坐免既歸日居韋曲別業不涉城市冢宰許
進語人曰吾遙望關西有二高焉一華山一世隆也

武宗即位起南京戶部尚書劉瑾泰鄉人有勸泰行
金謝者泰曰吾進退在天居兩月瑾矯旨令致仕自
是長居韋曲年八十卒泰奉身儉素貴客至不過二

肉為尚書未製緋及卒家人製以殮

名山藏

泰擢御史

吳俗令行皆饋樓船公不受民固饋乃駕至張家灣
還之吳人歌曰時苗留犢雍公返舟

墓志

泰巡鹽兩淮

見竈丁貧而鰥者幾二千人比二年悉與完室既去
淮人詠曰客邊檢索渾無硯海上遺民盡有家又曰

了却四千兒女願春風解纜去朝天

見聞錄

東思忠字進伯華州人成化丙戌進士授刑部主事錄
畿內刑獄平反為多嘗曰獄有微旨非敲扑所能致
也陞松潘兵備內修政事外樹兵威諸番莫敢侵邊
松潘孤寓萬山轉輸斗米輒費數金主藏吏多侵盜
思忠盡滌其弊倉庾陳因又嚴減尅之禁正私鬻之
罰茶馬有序外釁不生又於大石佛嘴鑿山開路以
便轉輸至今宜之甲辰乙巳兩出軍勦逆命者直抵

巢穴所獲軍器頭畜無算西蜀士民倚為長城卒官

康對山集

漢字希節思忠字弘治戊午舉人正德中授池

州同知招亡附籍戶口增往昔二萬劇賊劉七流劫
吳楚漢選民兵數十人陣要路斷賊往來賊不能犯
時石棣黠盜章仁胡天寵王浩等聚眾行劫漢分兵
大洪諸嶺凡數十戰賊遂平有程文寶者殺人亡命
匿於胡氏吏捕之急文寶反賄捕者使誣胡漢察有
寃色鞫之得其情一郡驚服陞南昌知府歲饑出粟

賑濟他郡悉來就食遷長蘆鹽運司使致仕野字希
孟思忠第五子弘治壬戌進士授陳留知縣邑瀕河
歲為患野築堤禦之更以其淤為桑麻地流亡來歸
益戶口數千陳州盜殺典史行賄自脫野窮其事殺
之於是河朔數百里皆欲赴愬陳留後陞刑部主事

賈
志

侯恂字誠之白水人成化丙戌進士授戶部主事會計
精當以能陞山東按察僉事督京畿軍儲累遷右僉

都御史巡撫大同威振邊塞轉副都巡撫三晉風猷益櫟已召入留院提督操江恂負才鴻碩操履清儉

故能其官

同州志

李崙字世瞻臨潼人成化己丑進士授屯留知縣縣積猾舞文獄訟錢穀皆出其手崙至悉按斃之陞戶部主事除弊革奸出納分毫不爽出守廬州賑荒活萬人立俵馬法定鹽價創河橋廣積穀陞河南左參政

賈志

崙卒妻郝氏不能舉火守臣奏聞命所司月給米

養終其身

西安府志

梁澤字汝霖家貧為掾縣令目所書牘奇之俾學舉成
化己丑進士歷陞巡撫貴州山東所至斷獄剖決如
流彈劾不避權倖貪污吏多解綬去以忤時謫茶陵
令復歷浙江參政皆以廉惠稱

三原志

閻仲實字光甫隴州人成化己丑進士為考功隨材量
用鑒別精當公論倚以為重遷河南副使歲凶人相
食遍歷所部存省賑貸全活甚眾弟仲宇字泰甫成

化乙未進士授鹽山知縣累遷山東副使分理臨清
時有妖僧惑衆仲宇擒之寘於法歷陞右副都御史
巡撫湖廣時洞庭襄漢間劇賊充斥苗蠻梗化仲宇
先後設謀擒之陞兵部尚書仲宇資性端重敷奏明
切為政尚寬和不喜更張故所在稱治

實志

張曉字光曙三原人成化己丑進士知襄垣縣多善政
召拜監察御史上書論萬貴妃事同列讀其辭皆縮
舌上笞而釋之尋為湖廣僉事施州亂全省震動諸

僚皆莫敢往曉請行曰此可以義動至則宣朝廷威德亂者感服陞河南副使時河決為患曉奉命督役導河幾千里俾復故道工竣晉按察使陳州有告毆死少年者三年莫能決曉閱屍驚曰安有少年缺其齒乎訊之果捕得少年其屍乃一乞嫗也事遂白尋

以憂歸

馬志

張撫字世安寶雞人成化己丑進士授刑部主事性剛決不畏彊禦都督王義劉寧廣寧侯劉銓山西鎮守

太監石巖各有罪衆莫敢決撫立訊決之浙江副使
張蕙罪惡彰聞使者莫敢言撫治之遂服罪進四川
按察副使蜀大饑捐俸易米賑之民賴不孱陞湖廣
按察使楚多積盜撫出俸金捕之盜由是息尋晉刑
部侍郎明年乞歸撫精於吏事所在以嚴明稱

賈志

郝滋字洪濟高陵人成化辛卯舉人授中牟令守廉奉
公興利除害不踰年境內大治有水患歲常淹沒民
田滋築堤十八里植柳衛堤復得閒田千頃民甚利

之明年秋螟螣害禾滋祭於漢魯恭祠次日蟲皆殞

擢均州守卒

劉時蘭
撰墓誌

王輔字良弼同州人成化壬辰進士知長垣縣時值荒
後民逋三年賦監司督之急輔從容畢辦民不知苦
邑東北窪下每秋雨潦萬頃俱壑輔鑿渠疏之盡為
良田徵為御史出按四川貪奸斂迹素性負氣尋謫

鄖陽府同知罷歸

同州
志

張繼字述之鳳翔人成化戊戌進士以戶部郎中出知

順德府凡事務存大體持法平恕而人自不寃時歲
旱引躬自責卽雨境內多渠地高水下製桔槔以濟
旱又教民植桑蠶事大興有盜刼鉅鹿捕官執齊民
顧招等十三人皆誣服繼按得情皆釋之既獲真盜
人稱神明時有戚里占民田辨者輒毆死撫按檄繼
往勘繼以地還之民貴戚悚息

賈志

韓紹宗字裕後朝邑人成化戊戌進士授刑部主事部
有大獄尚書輒付之張文安伯者勲戚也族人奏其

不法紹宗當訊輒置之律御史柯忠巡按直隸劾都
指揮王章章故橫且多內授亦奏柯詔紹宗往勘章
以守備體謁道中紹宗曰章犯人何得先謁勘官杖
之途比勘果如柯劾章免官大同鎮守太監石巖巡
撫許進互奏劾詔紹宗往獲石十大罪而許無瑕獄
成石奏紹宗黨文職差官改勘而紹宗卒非黨弘治
戊申京師大水米價騰翔紹宗乞應糧俸者預支三
月價可平詔從之東廠錦衣之獄皆付刑部有所枉

不敢辨紹宗送獄堂審尚書曰此獄自殿衛來耶紹宗進曰大人第當視情法如何勿問所從來聽者聳然陞福建副使有屠執強市肉者以告蓋鎮守陳太監舍人也紹宗捕其黨陳曰若等不知新韓副使乎皆械送之而抵罪嘗受御史委同右布政分濬雙門河未兩月所治河皆考績遂署司事兼海道時海寇王某聚衆劫海上曰韓公不去我輩不生於是以千金賂鎮守鎮守即奏罷紹宗官紹宗居官守法毫髮

不可動所至率綱紀其大者其餘不勞而正所立偉

然

淫野集

王坪字信之商州人成化中進士歷鳳陽知府時歲凶斗米千錢坪多方賑濟全活甚衆調南陽法令嚴明俸給外一錢不取第塏字器之官地曹主政為人尚

節氣篤故舊時稱二難

商州志

宋德岐山人成化中進士由溫縣令歷浙江道御史四川副使法度嚴明宅心仁恕更能以清介自守至作

令定溫翠之田巡方洗焚死之冤持憲靖王剛之亂
尤宦績表著者又同里羅佑以貢生尹寧陽亦有廉

聲

賈志

張雄王鉞馬祥皆同州人成化時進士並官主政雄刑
部鉞戶部祥工部雄素貧在部能礪節執法比卒也
家無擔石鉞有幹濟才陞郎中總理糧務出納精覈
人不能欺亦不敢撓以私祥始任都水督漕運挑直
河五道築堤三百里漕艘賴之調營繕司清釐匠役

陞虞衡郎中監遵化鐵冶剔弊恤工終山左鹽運使

同州志

邵錦商州人成化中舉人知雞澤縣修法度尚寬和損益因俗民不知擾值流賊亂錦礪人心固守一方賴

為保障

姓譜

謝文字顯道金州人成化戊戌進士為御史巡方所至剔弊糾奸不避貴近後知河間折獄賑飢惠義兩盡

終山東參政

馬志

王章字廷憲膚施人成化中進士任大理寺副鞠讞平
允以同官逮罪謫同知高唐州涖政剛果陞知州卒
同縣高俊以舉人同知汾州剛方明斷九年考績民
遮留不得行又任三年以病歸

延安府志

于寬字克弘咸寧人成化中舉人事繼母以孝聞在太
學時友人任良病沒良妻鬻二女歸葬寬為贖還率
礪同志捐貲歸其喪後知鞏縣積穀救荒築隄障水
擢守鄧州築城禦盜有功鄧人尸祝

賈志

張瓚字廷奎中部人成化中舉人知睢州陳案積獄數日而判卒於官貧不能斂直指倡有司賻之始歸曾

孫志久知什邡亦有績

賈志

解經醴泉人成化庚子舉人弘治中令邯鄲性儉素自奉甚薄朔望謁文廟進諸生講釋經義課試嚴明貧民有累年負租稅者與約次第輸之不刑一人凡徭役躬自簽派輕重適宜政平訟理獄無繫囚

畿輔志

陳梁字伯棟涇陽人成化間舉人任渾源知州時以南

人充大同軍役不習水土多死者梁條上其事請以本土衛所軍代之報可陞贛州同知有巨賊數萬剽掠郡縣梁以計誘執百餘人乃遣人分諭諸賊使解散賊黨悉平城南漳江人多病涉梁作石橋人便之

稱為陳公橋

賈志

韓福字德府西安前衛人父鐸天順己卯舉人知茂州有聲福登成化辛丑進士歷滑縣章丘令廉威並著擢御史敢言國家利弊出守大名民不知吏道不拾

遺奏課第一累遷戶部左侍郎因忤宦瑾謝職歸

馬志

劉璣字用齊咸寧人成化辛丑進士初任曲沃令陞瑞
州知府家食嘗不給公服外無餘衣時新昌盜起璣
入賊巢面諭賊見璣皆羅拜聽命立時解散後歷遷

至戶部尚書

賈志

屈直字道伸華陰人成化甲辰進士初直未第時值歲
饑絕糧謁推官乞賑推官日三邀直會食曰吾所訊
囚二人者將論邊戍數邀子來彼必求援吾釋之必

厚謝子直曰賑可賂不可推官歎服授刑部主事部
獄卒厚索囚賄不如意輒殺之直根治得狀白尚書
論如法錦衣奸人依憑權勢郡縣賦至輒誘解人代
納號攬頭解人多破產事覺白尚書按治及逮繫攬
頭權勢人果邀奪之直入朝言於錦衣曰錦衣朝廷
法官乃不容刑官守法耶明日攬頭至俱抵罪直歷
刑部三司幾十年權貴憚之陞重慶知府府有妖擲
磚石毀房舍又時有火災直告於城隍妖火遂息夏

旱禱於元武山有白雲如蓋往返隨之大雨如注歲
大熟陞浙江按察使巨璫至浙怙勢作威欲三司跪
謁直率衆不屈璫怒甚直從容言我輩見怒當何罪
璫即改容揖衆入坐陞太僕卿太僕掌馬利近幸沿
為奇貨攬納請託直力禁之乃共譖於劉瑾瑾察得
其情諸譖不行遷操江都御史復改督漕運以運船
稽遲置簿給付運官日記所運水程及阻風守淺時
日以備考核其法至今用之瑾既敗某御史倡言直

為瑾鄉人數數遷轉宜罷遂致仕直毅而有謀剛而
不虐才敏而力足以行之故所至有聲與人言侃侃
無隱亦以此得罪

苑洛集

受善字我虛直曾孫萬厯乙

酉舉人知晉州惠義著績擢真定同知司儲上谷以

才幹勞勩見稱

賈志

亢時霖藍田人成化丙午鄉試任長子教諭陞廬山令時天

全叛逆逐縣官掠居民人為霖危之霖至開諭招撫患遂

息又募勇士殺其同類之難制者廬山立祠祀之

藍田志

谷賑咸陽人成化丙午舉人知巴縣以廉介自矢卒之

日同官入視其家圖書數卷而已

四川
總志

劉聰字達夫中部人性剛明果斷登成化丁未進士累擢彰德知府翦除豪強屬縣肅然宗室有風七兒者日至府需索無已聰疏其不法自是斂跡歷左僉都御史巡撫保定皆有異績長子佐登進士官戶部主事季子倌舉嘉靖鄉試知聞喜石州皆以清白強幹世其家璋字尚德聰弟正德庚午舉人授南和令時

河渠久湮璋修復灌道民沾其利邑十七社十社土
著餘七社以處晉民奉例墾荒不稅於是民有新舊
田有多寡稅有盈縮璋躬履丘畝使田租相證民卒
歸業陞知霸州人多豪俠剽悍璋懲一二魁黠境內
肅然城傍九河故道歲十九潦盜賊頻興璋平役薄
征水不為災盜賊衰息致仕歸璋曾孫紹萬厯時舉
明經亦篤行君子也

延安府志

馬通字致遠同州人年十二補州庠生入太學成化中

銓博野丞持己廉平不私受一牘嘗攝東鹿篆判斷
明敏人頌神明陞知本縣東鹿人復留不欲還兩縣
詣闕爭之冢宰以成命諭遣始已蒞博野凡舊政不
便民者次第除之邑用大治憂歸服闋補繁峙繁峙
素通賦士不知學通勤勸課選社師訓民間子弟俗
為一變賦亦畢輸會大水沒禾他邑承風減報通獨
報全災邑人感悅俄病卒囊無餘物

賈志

雷爵朝邑人成化中舉人初知清苑歷守祁州廉謹自

持大學士楊一清見之訝曰若非知清苑守祁州者
耶歷聞子名今老矣有大名善地特以待子為優游
桑榆地遂授大名府同知至大名直廉如初行部肅

然匹馬果蔬自給

賈志

樊資字文質朝邑人成化中任榮縣典史歲饑出俸賑
之人賴以生羣盜嘯起資督繕城池屹然保障仍單

騎往諭之羣盜感其恩信立即解散

馬志

尚達字兼善同州人貢士弘治初任岳陽令政尚慈愛

縣有澗水為民患達開渠溉田歲旱出粟救濟

岳陽碑記

李鴻乾州人弘治己酉舉人正德六年知深州適霸州賊起縱橫河北鴻率眾登城分條屬守四門躬自提督往來巡眺賊知不可克乃引去一郡獲全興學校撫流移百事修舉百姓德之

畿輔志

郭桂字時芳咸寧人弘治庚戌進士知安丘王某者邑中大豪也令至輒啖以利既乃格制之桂莅任使人啖之如昔桂發其事論殺之有父訟其子盜金者桂

知其後母也謂翁曰亟歸金在若媪衣笥中歸果得之父子如初後判湖州儲運先期輒辦遷泰州知州州多積蠹有巨惡號三虎桂至發其奸事斃之遠近肅然轉鎮江同知攝郡事決獄若神遷平陽藩邸素為盜數桂至後宗室咸畏其威盜賊遠遁尋擢參政

卒

賈志

王錦字在中醴泉人弘治庚戌進士初任襄垣令陞蓬州知州秉公執法請託不行饋遺一無所受時以剛

明稱

四川通志

後陞山東僉事兵備萊州制禦盜賊綽有

方畧正德閒致仕

醴泉志

姜實蒲城人弘治庚戌進士授曲沃知縣以廉能擢御

史巡鹽河東值歲饑賑活萬計巡長蘆兼理河道凡

權貴夾帶商貨及站鹽紅船一切革之鹽法流行陞

湖廣僉事期年黜不職官十八人墨吏望風解綬生

平寡言笑剛正不撓事親尤以孝稱

馬志

張憲字廷式涇陽人弘治壬子舉人謹言慎行為學者

軌範以篤孝聞授絳州學正所造士多成立陞登封
知縣有霸州巨賊數萬攻城憲招降被擄男女百餘
人斬首五十餘級事聞賜勅勞之陞順天府通判卒

官

賈志

謝朝宣字汝為西安左衛人弘治癸丑進士任監察御
史巡按雲南監鄉試令土官咸得觀聽鹿鳴遠人感
化陞浙江副使因忤權宦謫黃州同知招流移恤貧
乏陞四川副使征勦有功斷獄無滯

賈志

趙繼爵同州人弘治癸丑進士授行人累陞山東副使
備兵臨清皆有治績充屬沂郟滕費諸州邑積年逋
賦建議蠲罷金鄉魚臺有左道惑民者監司欲以叛
治繼爵力言此愚民被誘第去其魁則餘衆自解監
司從之所活甚衆薊賊劉七等攻城繼爵聞變急築
外郭七十里浚濠崇櫓賊不敢犯尋免歸子國良字
邦遂風度高朗有智畧初以制科授工科給事中不
阿權貴南畿與江右軍民仇殺獄三年不決廷推國

良往勘一訊而獄成會大察以飛語謫孝義丞量移
宜興令遷彰德郡丞宜興民赴臺乞留以千計尋晉
度支郎出守太原值有邊警國良圖畫方畧防禦甚
周已與同官分城而守難民蔽野求入他皆嚴拒國
良獨啟鑰納之民為立生祠以功進按察副使兵備

潞安

同州志

楊穆字子喬臨潼人弘治乙卯舉人授杞縣知縣剛明
自任時宦官需索無虛日間穆風力相戒無敢干者

有夫婦夜出為人所殺慘曰此必同舍所謀擒治之
果得其情時流賊猖獗慘濬隍引汴水為阻多設戰
守具賊覘知遂不敢入遷汝州知州儲粟萬石以賑
饑集屬邑俊秀授以經學士風丕變尋倖大名額糧
歲有餘羨慘悉貯之庫又倖松江歲有織造餘銀數
萬慘悉給機戶無所取陞長蘆運同卒弟樞字子極
弘治甲子舉人授夏縣知縣擢御史巡西城法令嚴
肅盜為潛遁後陞四川僉事平綦江盜賊有功

賈志

金方集卷之二十一
賀有年字天錫臨潼人弘治乙卯舉人通判鄖陽府清
盜平徭修學均賦尋補廣平境內多盜憲司嚴檄督
捕他邑多誣陷有年開釋無辜百姓恃以不枉既而

同知兗州府疏諸泉源隄防運河漕輓以濟

臨潼志

張守字惟約涇陽人兄官弘治乙酉舉人任雲南知府
土寇經年相讐殺前太守不能治官至平之守中弘
治乙卯舉人任封丘令時巨寇劉六所在攻城多被
殘破守百方禦之城賴以全陞昌平知州州多勲戚

內官守處之得所皆帖服陞永平府同知有以民田

獻勲臣者守繩以法累陞成都知府卒於官

馬志

孟醇鳳翔人弘治乙卯舉人知良鄉縣以能稱擢御史
時劉瑾黨人魏斌亂鹽法醇以成憲折之斌屈服陞
成都知府駱胡盜起殄其渠魁餘黨悉解散歷官參

政

賈志

馬應祥字公順咸寧人弘治丙辰進士授河內知縣時
邑多風逋應祥考戶數躬為編次奸滑斂手自是輸

將恐後時有殺人者不可跡先期禱越國江公祠下
曰神許我得情則雨果雨翼日啓棺諸人羅跪有鼠
自棺出竄一人衣襟下忽不見應祥指之曰殺人者
汝其人色動推究果服又郊外殺一人未絕移縣門
內許士民縱觀有一人嗟歎其側祥遂執之一訊即
得縣中稱為神明召拜吏部主事出備兵陳睢再改
山西督屯屯田子粒積負併徵應祥請諸撫按許他
物相準即以給士卒甫三月完十七八擢山西按察

副使上疏乞休

賈志

李璽字朝信鳳翔人弘治丙辰進士授荊州府推官擢
監察御史按河南山東直隸諸郡縣時劉瑾用事事
多掣肘璽一切無所假貸由此忤瑾逮獄尋降為平
溪驛丞陞襄陽知縣超拜河南副使折獄聽政嚴怒
並行進職按察使致仕璽自起家至按使家徒壁立
赴襄陽過洞庭羣盜操刃入舟既見行李蕭索乃相

與嗟歎羅拜而去

賈志

張潛字用昭華州人。生而穎秀。從李西涯受尚書弘治
壬子楊邃庵督學闕中。以慶陽李獻吉洵陽張光世
與潛為三才子。秋試。三人同舉。丙辰第進士。授戶部
主事。劉瑾擅權。深用避匿。或曰公鄉人也不往。且有
禍。笑不答。擢廣平知府。時盜起流劫郡邑。潛多方捍
禦。郡中賴以無事。按行屬邑。省財力。均徭賦。黜舞文
清滯獄。興禮讓。洺土熙然。向風。擢山東左叅政。罷歸。

賈志

羅循號雙泉白河人弘治己未進士累擢鎮江知府平

賊有功終淮陽兵備

白河志

高選字朝用高陵人弘治中進士授戶部主事督通州糧務出納精密權豪不能為奸監督草場謝絕饋謁忤劉瑾致仕以薦復起郎中後緣事左遷鈞州同知時流寇圍鈞援入城外男婦五千俘賊數百人屹然為鄖襄保障陞兩淮運同尤能以清介自持卒於官

貧不能歸櫬

高陵志

王億字本一鳳翔人弘治中進士授閔鄉令邑素衝罷
宦寺往來擾民億力為裁抑縣稱大治丁憂歸服除
補濬縣不數月濬又治歷陞山東僉事分巡遼東皆
以清直著尋督餉京師太監張忠弟舉素驕縱攬解
河南歲餉侵沒至數萬官吏莫敢誰何億任事首發
其奸狀杖之舉惶恐謝罪會獄未具而舉死忠遂計
奏上前謫戍南海越五年始放歸

賈志

李濟三原人弘治中監生任芮城主簿剛方練達因民

為治陞本縣令改知臨潁潁民喜告訐濟至為平其
訟獄有頑悍者即懲治不少貸刁風遂息自是疏壅
理枉釐弊振弱百廢俱起後以疾去囊篋蕭然

賈志

侯珠麟遊人以舉人知大名縣持身廉勤撫民仁恕居

憂服闋再補閩鄉治亦如大名時尋卒官

賈志

馬隆字道亨中部人沈毅剛介與人寡合由舉人任大
同司李廉平明斷戍卒之變僚佐咸走隆獨不動亂
兵鼓譟入王府閭隆在遂退其見信於人如此終浙

西通判

賈志

白比珩字康德綏德州人以貢生判臨清擢彭山令劍州茂州守所至有惠政弊衣蔬食恬如也歷工刑二

部郎中

綏德志

張綸興平人弘治辛酉舉人知羅江縣善決獄人頌神

明擢知綿州

四川總志

王納誨字獻可長安人弘治壬戌進士授工部主事治漕臨清嚴約束謹蓄泄公私便之調吏部課覈嚴正

倖路杜絕忤當道謫易州同知覈軍實繕城郭晉河
南按察司僉事理屯田河南寇亂屯多荒蕪誨給以
牛種時其征斂三年屯政底績郡有豪黠怙勢武斷
官司累年莫能究誨執之伏法郡獄繫囚千餘按牒
剖決不三日獄幾空改備兵敘瀘懷遠人固封守宣
威敷澤人稱父母晉副使巡兩川風裁肅然蜀境為
之改觀

賈志

李伸字道甫三原人弘治壬戌進士授臨汾令晉王府

軍校肆橫殺人前令莫敢治伸至悉寘於法境內肅然擢御史巡紫荆等關時礦賊千餘作亂伸執首惡餘黨解散

賈志

伸正德中守嘉興有大豪侵官錢事覺

廉得之即定爰書有殺兄謀奪其官者獄久不決伸一訊而服舉措因民不干聲譽

浙江通志

張鏜字尚節咸陽人父英善屬文鏜舉弘治甲子鄉試就選安邑改靜海令靜海密邇京師為水陸要衝天子南巡諸郡盜起百姓愁苦鏜供應弭捕各有條理

境內安堵

漢陂集

周紹字克述高陵人幼與程汝修呂柟同學皆以聖賢
相期許舉弘治甲子鄉試受戎縣令莅政公清邊民
敬服調任江陵時縣有江水為害紹創築長堤民獲
安居又墾田千頃至今利賴

西安府志

李恕字道夫富平人弘治中進士初任德平知縣遇事
敢為發積穀賑饑民歷陞四川僉事提孤兵數千破
大盜藍四輩數萬衆以智勇見稱陞貴州參議致仕

賈

志

許世昌澄城人弘治甲子舉人授太和令陞順慶府同知時廣安賊勢猖獗攻城甚急世昌率民兵禦之圍乃解廣安方饑甚世昌極力賑濟又買給牛種荒蕪盡闢順慶素多水患城屢圯於水民歲苦修築世昌開渠西山以泄之患遂息時涪州盜賊蜂起世昌奉檄勦平之院使者上其功世昌念母年高疏乞終養母卒服闋復除承天府同知會上南巡世昌署府事

時改建陵寢開築城池創立廟社添設司衛皆倚辦

於府竟以勞卒官

苑洛集

張羽字伯翔南鄭人登進士初授行人武宗初宦官劉瑾嘗以同鄉干公公獨不進後巡按山東會中官導

上遊獵錫予頗濫公上疏曰明王慎德四夷咸賓不以禽獸病民猶謹衣裳之在笥也上覽其奏曰真御史也出守廣平建漳川書院建閘通水開田萬頃以
利民生後超陞山西參政首擒妖黨巡撫不恤軍士

衆軍作亂公奮然入亂軍中衆畏公正直亂遂息陟
江西廉使下車首訪巨奸豪滑盡賞諸法轉貴州布
政使吏白積餘之金舊規不報公盡數登籍後陞大
理卿釋冤抑活民命不下數百後陞工部侍郎展修
國學督修皇陵壯麗完固裁省節儉不下億萬自行
人至司空歷官凡三十年清貧如洗

呂涇野
撰碑文

史華渭南人貢生弘治間知潛江縣勸課農桑葺理學

校諸所廢墜罔不振興為一時循吏

湖廣
志

程珏字兩玉朝邑人弘治時貢生為富順丞下車捕巨猾大奸縣人悅服有戴氏子殺三人獄久不具珏一訊而抵罪以母憂歸不復出子範字君儀正德丁卯舉人初判開封府有倉官餽餘金範怒斥之以艱歸復除大名府府舊治天雄鎮元時圯於河鞠為茂草範以暇時督率民兵樵蘇陶磚不煩公帑四門堅密屹然畿南保障會河決為患範相水勢自白屋陂口築堤七十餘里水患遂息郡人為立遺愛碑

朝邑志

劉澤字惠民三水人弘治中以明經任廣安州判陞捷
為知縣執法不阿調洪雅城池學校煥然一新每食
惟青菜一味蜀人皆曰劉青菜後陞僉事

三水志

馬璿字文機涇陽人以掾為平谷尉決斷訟獄遠邇稱
平修葺古北口邊城禦敵有功陞順義主簿司易州
廠薪三月逋薪悉完限於資格未竟其用人咸惜之

馬志

王朝雍字仲和朝邑人正德丁卯舉人任嚴州推官決

獄公允署篆淳安桐廬人有與頌錄陞知澤州青羊
賊起朝雍陷其中賊不忍害叩頭送出因熟其險阻
告當道按地進兵賊遂平歷陞山西僉事

馬志

倪璣字公在咸寧人正德戊辰進士歷給事中後以誣

謫佐嘉善立法更化嚴保甲毀淫祠置義塚及社學

書院甚有政教

姓譜

陞知定州世宗入繼大統所經郡

邑咸以錦繡為居至定州璣獨以黃布上嘉其儉約

御書可以二字賜之尋陞山西口北道僉事

咸寧志

閻欽字子明隴州人正德戊辰進士選吏科給事中嘗
抗疏勸毅皇視朝封駁不避權貴同列彈劾諸疏多
出其手當道忌之遷河南兵備嘗推演武侯八陣圖
為九曲新書刊布以訓戰士募義勇修城斬謹烽堠
遠近恃以為安羅山勢豪張輔殺其妾及妾母妾母
之族訟諸官輔反誣以他事陷獄死欽廉其狀執輔
抵死信陽貧富兩民爭田里中二惡少素怨富民誘
富者殺之旋又殺貧者誑其守謂自相殺欽按之具

得情狀斬之以徇劉學恆者汝寧大盜也屢捕不獲

欽出奇計執之論死其黨百人悉解散遠近駭服

賈志

楊淳字重夫先世出華陰縣明興徙臨潼淳登正德戊

辰進士授御史時宦官劉瑾索求科道瑕疵適決大

辟衆皆退避淳請行瑾惡其不附己改工部屯田司

主事辛未差荊州抽分請託不行後陞員外郎管臺

基等廠尋差遼東查盤軍器甲戌陞都水司郎中奉

勅管理通州南旺河道時中官方橫舳艫往來陵轢

州司需索無算有號二劉者勅使西域取佛其艘所
費萬計沿河州司懼不敢支淳移檄擒治其黨衆斂
迹而去陞寶慶知府南楚風浮俗又尚鬼淳首興學
校以勸生徒擒妖誣毀淫祠浮風丕變調知鄖陽陞
山西副使四川參政次年陞本省按察使陞右轄尋
陞左轄淳在蜀威茂諸邊將常因蕃人入寇多殺無
辜以邀賞賚淳諭以禍福勸戒切至諸將感悟平生
清忠自勵慕趙清獻之為人遺榮養素居室蕭然

撰墓誌

曹蘭字德芳咸寧人正德辛未進士歷山西布政使大
同兵變蘭履險決策賊不敢犯晉山東巡撫子韓嘉
靖乙未進士累陞貴州參政莅政嚴敏操履清潔所
在有聲

咸寧志

南大吉字元善渭南人正德六年進士嘉靖初以部郎
出為紹興太守二守靳塘多智譎大吉下車郡事多
諮於塘塘以書生易而謾之大吉陰察其情而陽為

不知者既三月一日坐堂上召諸吏抱案集庭下數之曰若等善欺予某事然若以為不然某事不然若以為然何欺予如是亟持案來案至立剖數十事人人惴服塘駭汗齬舌不敢出一氣由是飭條教頒下邑懲奸戢暴不撓貴勢巨豪石天祿戴顯八者窩盜致富官府素不能治逮捕斃獄中每臨重囚必朱衣象簡秉燭焚香大開重門令衆見之望見者以為神人不可犯是時王文成先生為大吉會試舉主故稱

門生大吉嘗於先生前自省臨政多過謂先生何無
言文成曰吾已言之矣吾嘗言良知良知固自知也
己自省加密文成曰往鏡未明可得藏垢今鏡明矣
一塵難住此入聖機也勉之大吉為葺稽山書院簡
八邑才雋子弟講習其中刻先生傳習錄振起絕學
大吉政尚嚴猛喜任事不避嫌怨已濬郡河開上竈
溪覈理侵墮以是籍籍謗騰郡人居吏部者銜之遂
以大計落職去大吉每有書來文成問學無一語及

升沈得喪間文成壯之還書相勗畢志此學

明史
竊

穆世傑涇陽人正德辛未進士知樂安縣汀贛流寇攻縣世傑擒斬首惡黨與立散居官以興學校育材為

務鄰民爭歸附焉

涇陽
志

郭田字汝耕長安人正德甲戌進士知嘉善縣性簡直政令嚴明堅持冰蘖操人有饋遺輒峻拒每見解銀指謂左右曰此阿堵物能亡身敗家爾等毋為所污時有上書陳其過者即榜之縣門引以自罪

嘉興
府志

張幾字知幾藍屋人正德甲戌進士司理廣平不阿權
貴民有汙田歲苦潦幾教之種蓮鬻以輸賦尋調真
定真定視廣平尤劇幾理滯達枉決遣如流以考最
徵入比部改丞松江職董漕運幾飛輓先諸郡召拜
山東僉事按察青州諸郡青州濱海無賴者採山煮
海恣睢睥睨尺符不能約束幾以間執諸豪逮繫之
衆皆解散尋乞歸

藍屋志

畢鸞鳳翔人正德丙子舉人初知朔州勸課農桑興育

士類累陞南京戶部郎中後補工部提督漕河制平
水閘并涵水洞民獲灌漑利出為大理知府姦豪斂

迹胥吏格心郡中大治

鳳翔縣志

趙輔字君鄰華州人登正德丙子鄉薦授扶溝令縣故
有大猾善結官吏武斷不法輔至有告大猾事者大
猾懼罪亡匿久之知輔賢來謁謝輔反覆諭導許其
自新卒為善士調靜樂邑多逋稅民皆觀望不肯先
輸輔至應期稅辦遷廣平通判理冤釋枉廣人尸祝

華州志

雷子堅綏德州人正德中舉人知廣州賦性剛介廉潔勤敏不畏強禦值流賊劫掠繕城池治兵器賊見有備遂引去民賴以全因抗論將帥失利當路惡之遂落職將行出所貯金幣於官其清潔如此

綏德州志

牛斗字應宿朝邑人正德時登進士嘉靖初官兵部員外初世廟詔革冒功武職若干人無何夤緣求復當軸秉樞皆受賄為奧助獨畏斗梗正懷千金不敢入

秉樞諷司務喻意斗不可乃召斗欵曲為言當國者
行有美秩酬若矣斗曰壞國紀而得美官斗不為也
秉樞怒幾欲掎之斗固移疾不視事尋出知萊州府
又忤權貴罷歸人咸惜未竟其用云

同州志

管楫字汝濟咸寧人正德中進士授刑部主事陞吏部
文選郎中能以清苦自持歷任山東巡撫整肅官方
甫五月齊魯翕然稱治以母老告歸行李蕭然圖書

外別無長物

賈志

白宗舜字明廷清澗人以舉人知蒲州蒲素多豪右宗舜一介不取禁絕干謁嚴革諸弊猾吏畏服尋調夷

陵亦有惠政

賈志

惠儒長安人素行清介正德時以舉人任兗州通判持己甚廉執法惟公有中貴斃民命臺司下儒理之中人懼餽金一罇覆以醬儒即發其事竟置於法陞同知河間俸給外一錢不取致仕歸

長安志

李東藍田人正德丁丑進士任丹徒令存心仁厚涖政

廉明時武宗南狩中外洶洶奸民乘間為奸詐稱乘
輿至東疑其偽執而訊之寘重典召為監察御史巡
方江北兩川皆以威稜著

藍田志

王朝塗朝雍弟正德丁丑進士令三河權璫張銳者縣
人也前令皆先謁跪而獻贄朝塗獨不為禮銳怒囑
冢宰罷朝塗官選司以其廉正固爭之調鹿邑值沈

丘盜起守城有功陞知宿州

朝邑志

李蘭字秀夫華州人正德丁丑進士授戶部主事賞軍

宣大宣布朝廷德意軍士感泣後屢管易州保定等處倉又督理永平山海薊州等處糧所至弊絕風清轉員外郎郎中時稱蘭為鐵郎中出知重慶府察民

隱戢豪右一郡稱治

華州志

劉倫榆林人正德己卯舉人知山東定陶縣值流賊劫掠郡邑所過殘破倫先期繕城練士賊薄城倫躬提枹鼓破其攻具城賴以全又均徭役勸農桑息爭訟興禮讓不二載縣以大治終戶部山西司主事

延綏志

穆相字伯寅三原人正德辛巳進士授沂水令兩遇大盜降之歲饑煮粥給食所活甚衆擢浙江道御史巡視東城權貴斂手敕巡三關築隘口四百五十七置器械三萬餘斷囚八百餘案巡按山西開沁水以通溝洫又疏清源太原渠招降青羊山巨盜復巡江西以勞成疾卒

西安府志

劉邦禎字兆吉華州人以歲貢選為通許縣丞值巨盜高寵作亂知縣段某惶懼成疾邦禎曰事誠在我乃

設策勦平之事聞擢曲陽令會武宗南幸官民驚惶
邦禎諭以事上之義隨宜供應調蒲江令蒲素奸梗
難治邦禎莅政嚴明民罔不服以老歸

華州志

文清字潔之醴泉人監生任射洪教諭人材輩出鄆藍

作亂保障有功

馬志

宋惟忠字守正安塞人正德中以監生任新都簿禦賊

有功民立生祠陞知徐溝政平訟理吏民畏服

馬志

張偉米脂人監生正德中令邯鄲廉勤幹濟百廢俱興

時薊盜攻畧城邑偉築城為守禦計城西沁河歲患衝激偉導使別流建樓橋築墩臺不踰月事竣寇至環攻不能克邑賴以寧

畿輔志

秦登字允升咸寧人嘉靖元年中鄉試選昌平學正嚴立課程作興士類擢同知鳳陽淮決築堤造梁於泗工役之費皆所自措會歲饑請賑全活甚眾尋補四川順慶肅清軍政陞崇王府長史以輔導自任告歸卒子可久字孟徵舉嘉靖丙午鄉試謁選揚州通判

攝江都事廉明勤慎訟獄稱平陞知濱州盡心撫字
不避勞怨濱城壞可久為修築之屹然保障

咸寧志

弟

可大字仲容嘉靖中進士授東光令丁外艱起補光
山令以績最擢兵部武選主事歷員外郎考察武臣
不避權貴尋陞山西參議擢四川副使兵備建昌值
土寇沙氏亂撫鎮主勦可大主撫竟以撫定陞山西
行太僕卿兵備寧武尋致仕可大幼岐嶷長而穎脫
博通五經尤長於詩弟可貞字秀章萬曆中進士為

富順令亦有善政

賈志

盧紳字汝佩咸寧人嘉靖癸未進士知遂寧縣有水患築堤植柳水害永消累擢湖廣副使撫治荆南荆南界連川貴諸蠻構兵連歲上怒下守臣會議紳曰蠻性蠢爾若繩制太嚴恐生他變不若開諭利害俾罷兵息民足矣從之兵遂解陞江西參政瑞州寇起單車諭散其黨擢貴州按察使衛指揮貪暴激變軍士連結諸蠻為亂紳至執首惡餘悉宥之進布政使改

順天府尹時有勲貴奪畿內民田數百頃關說京兆紳力拒之擢戶部侍郎總督倉場兼理西苑農事清查積貯餘米二千餘萬石以裕國儲拜南京戶部尚

書

賈志

閻溥字允周興平人嘉靖癸未進士授刑部主事時光祿崔卿子殺人其子故宰相甥曲為請溥謝曰僕與相公均有官守朝廷法顧為相公屈耶竟論如律出守保定路當四衝兵衛雜揉豪右戚畹武斷漁獵溥

一切持以法毋敢肆者癸巳大同構變朝命勘撫溥
揚威布澤反側向化晉副浙臺以為郡時與臺使抗
禮据撫舊事論罷遂不復仕

賈志

秦世顯字子修涇陽人嘉靖癸未進士任饒陽知縣饒
地瘠訟繁多盜世顯裁決如流案無停牘會有大盜
入境世顯親獲渠魁一人餘俱生擒而還自是境內
無盜真定有寇患世顯禦之一戰而平年二十三卒

西安府志

王良臣寧羌衛人嘉靖乙酉舉人庚戌俺答圍京師以
郎署督餉九門著才能出守澉江遷運使錙銖無染
正直有聲又同里景承芳官山西副使亦清介有惠

政

賈志

宋宜鄜州人嘉靖丙戌進士授行人奉命祭瀋瀋餽送
悉却不受擢監察御史有中貴不法疏論其狀忤旨
下獄未幾上悟擢真定太守郡事委積決斷如流驛
遞出納前守多私其盈羨宜令州縣自支歲省萬金

陞四川參政歲饑請賑活數萬人白草番作亂宜督

兵擒巨魁降其衆捷聞賜銀幣致仕卒

賈志

杜世爵涇陽人嘉靖戊子舉人任內丘知縣會世宗南

狩供應孔繁世爵俄頃立辦擒刁頑呂崇仁李政等

殺於獄築金堤官莊清修尹村四堡置錦繡堂鶴度

嶺二口民倚賴之

畿輔志 按陝西及涇陽志俱作世爵畿輔志作世鬱者誤

趙瀛字文海三原人嘉靖己丑進士初授章丘令歲饑

賑濟全活甚衆除凶緝盜民賴以安擢知嘉興府轉

兵備易州道邊功甚偉遷山東參政歸里時囊笥蕭

然

賈志

瀛知嘉興府事政尚剛毅多所興革疏濬城河

以其土運之南湖建煙雨樓時田多逋糧吏緣為姦

乃分田地山蕩二則賦額均平迄今賴之

嘉興府志

馬書林字子約高陵人嘉靖己丑進士初授河南輝縣

令申減上稅田三百餘頃改洩久潦地為田五百餘

頃輝民頌德有江西富民王冠者縱慾為惡買人童

男女合藥事發王冠求書浼囑者無數且饋千金林

一無所受寘之法陞河南汝寧知府時豪宗暴虐書
林申革崇王府長史軍校充發邊衛者二十餘人汝
民以安轉四川保寧府申減絲綾之累陞四川按察

司副使未任卒

高陵志

杜坤鄜州人嘉靖辛卯舉人判嘉興府興利除害勸課
農桑海鹽大豪賈植恃財殺人坤捕擒按治如法民

悅作洗冤記

賈志

馮友字益卿長安人夙性孝友篤志講學學者稱兌泉

先生嘉靖甲午舉於鄉歷任奇嵐知州築城濬濠邊
圉以固調忻州以募商飛輓繕修邊垣有功賜白金
文綺加俸二級晉保定府同知時嚴嵩當國其僕嚴
年以侍教生刺來謁友見刺即笞其人年恚嗾鹽院

吳某論歸

賈志

左思明字五河耀州人嘉靖甲午舉人為永城令修城
建橋設倉改驛立太丘書院以教士政績卓然陞知

趙州

耀州志

王宗堯字汝敬由天性字純夫俱富平人嘉靖時舉人
宗堯知郛縣興水利設社學天性判合州擒巨盜勸
農桑蜀人咸德之

富平志

廉傑城固人嘉靖中舉人知沁州能以至誠孚衆一時
教化大行冀南翕然稱治子汝為以舉人知應州守
正不阿革除夙弊應人為之立祠汝為子第以進士

官按察使

城固志

惠之翰字伯君清澗人嘉靖中舉人官大同通判時雁

門糧餉蠹吏多侵漁之翰至悉發其奸寘於法飲水
茹蘗遇事敢為不辭勞怨嘗曰苟利於民此官可棄
何恤乎人言子承芳以舉人司曲周鐸教士多成材

終戶部主事

延安府志

楊九澤字子德華陰人嘉靖中進士為洪洞令擢御史
巡按浙江禁奢費革火葬嘗疏請於漳州設重臣及

增設月港縣治時稱碩畫

華陰志

孫昂榆林人徐衡鳳翔人並嘉靖中舉人昂知陵縣衡

知高唐州時齊魯大飢餓葦藪道兩人各捐俸賑之
全活無筭昂後官南京戶部郎中倭犯南直輸運盡
策我兵以是克捷衡後知應州亦值邊警守禦有方

城不得陷

賈志

胡昂字文宿扶風人嘉靖中舉人任開封通判治才明
敏能摘伏有妖僧善幻形以行污穢昂剖其奸遠近
驚服遷松江倅見婦人在江上哭而不哀密察之乃

繼妻潛隕前室子而詐哭也即逮訊正法

扶風志

崔璉字宗商高陵人嘉靖中貢生為崇慶州判抑豪強
解冤誣常祿外毫髮不取告病貧不能歸上官為給

路費始還里

高陵志

王三聘字夢莘藍屋人嘉靖乙未進士授大理評事讞
獄多所平反擢僉事河南督屯政兼理驛傳時南陽
諸屯半侵於豪糧數影射三聘釐剔一清郵遞供應
困絀三聘規畫節省改僉事四川會都蠻猖獗三聘
主安撫同事者議不合遂歸里囊笥蕭然

藍屋志

薛騰蛟字時化渭南人嘉靖乙未進士授長治令均賦役恤鰥寡政平民阜累遷四川僉事分巡川東卿尹錢若愚貪墨無顧藉騰蛟即按劾之大盜銅梁朱洪受太平袁廷佐咸肆行劫掠負固不下騰蛟擒勦殆盡征苗之役騰蛟監蜀兵入楚轉饒以時人人用命俘斬七百級捷聞賜白金文綺陞山西叅議分治大同大同遭悍卒變當事者務為姑息騰蛟以嚴治之一軍肅然已遷副使遂歸不復仕

渭南志

張紹芳字孝先鄆縣人嘉靖丁酉舉人初仕襄陵高平
教諭正身率士遷沁水令廉介自守請託不行調五
臺築城禦寇修學育才民有張青天之謠比倅順天
名譽益著家宰張元洲知其賢即擢河間同知嘗攝
府篆庫吏進羨餘三百金叱去歸里囊橐蕭然鄆縣志
南逢吉字元貞嘉靖戊戌進士授禮部主事太廟明堂
諸大禮屬草多出其手出知保寧力戢奸宄悉與更
始暇則萃諸生之雋者督教之一時得人為盛民有

為盜誣者十一人寃十餘年莫能白一訊雪之陞副使備兵雁門慨然曰陣法不習匪我制敵敵實制我今之邊弊有甚於此者乎於是諭三關將士如令甲習之又數巡行三關外軍聲大振條上備邊便宜五事多觸忌諱執政不喜格弗上及考察用飛語罷官

賈志

高謙字孫益榆林人嘉靖戊戌進士知涑水縣清謹自守歲滿擢崇州知州及卒州人撤市巷哭貧不能歸

州民合贖始還里

延綏志

喬世寧字景叔耀州人嘉靖戊戌進士授南京戶部主事以僉事按川南時行郡縣獎良罰惡陞湖廣督學所擢拔無愧顏庚戌為河南參政有詔募兵河南世寧部署嚴整時裁損供費諸應募惡少多道亡且擄掠獨大梁士卒無一不法者尋督餉小灘小灘商賈閉糶轉餉無由輸官因即其直以為利世寧令轉餉者分糶旁邑奸商失利而民甚便之擢四川按察使

以憂歸

賈志

王邦憲字後泉耀州人祥符令王志孫嘉靖庚子舉人
初授徐溝令政聲茂著陞萊州府通判除舊守魚戶
之私去劉瑾蜡稅之苦萊人頌德建祠憲文章氣節
關輔稱美子孫為紳士者至三十餘人而國圖尤為
顯赫年八十四卒賈志長子國字伯禎中萬厯丁丑進
士以庶常授浙江道有權要占民田數千畝悉核實
歸之督學江南首拔士如朱之蕃顧起元等皆蓋代

才復掌河南道管京察備襯陳封事劾權貴直聲震
朝野乞歸終養尋起山西副使時中使勢焰薰灼窘
辱寮佐國獨能開陳大義頓令折服由是大僚方不
庭謁宦官擢兵部侍郎巡撫保定歲荒賑饑全活甚
衆大盜劉應第等聚衆倡亂國親討平之絕餽遺肅
屬吏嚴保甲廣積儲善政犁然晉陞蘇督疾作乞歸
圖邦憲第三子萬厯丙子解元丙戌進士任翰林典
試福建多拔奇俊歷陞吏部右侍郎以讒去起禮部

尚書泰昌登極特召起用會帝崩憂危朝事歸家病卒圖生平立朝不耦邪黨經筵多所啓沃纂修國史率皆實筆朝野重之庚戌拔俊得人稱盛人擬之為

歐陽永叔司馬君實云謚文肅

耀州志

李應奎字文煥白水人嘉靖庚子舉人知陽信縣以嚴明為理境內肅然值秋水沒田應奎履畝號泣自責百姓皆感泣入春米價翔貴奎詣中丞請發倉以貸中丞意難之奎力請得發民賴以生

白水志

趙忻字子樂盩厔人嘉靖辛丑進士授長洲令長洲繁劇難治忻拊恤備至獨於黠吏按罪無少貸晉刑部郎中出守保定時值歲祲忻開倉賑之備兵冀州飭器練士隱負長城之望治兵山西巡撫應天所至務鎮靜持大體汚吏皆惴惴矜名節

盩厔志

師桂字近溪臨潼人嘉靖癸卯舉人任青州守治礦盜決梗獄人服其威明時倭寇犯浙檄令監司守令部六郡良家子往禦之桂毅然請行親履行間矢石弗

避總督胡林疏薦其才遷守大同奏豪宗不法者九人咸寘於理其歲祿匱乏者以時給之一時豪橫畏

且愛焉

賈志

任璜字伯玉臨潼人嘉靖甲辰進士授成都府推官監守倉糧時月俸皆倍支致倉曹多累璜釐其弊出納如數有松潘指揮坐監守盜應抵臯或為乞貸許賂以金璜竟寘之法時當事要功者請加兵瀘叙等衛璜按其迹實未叛乃力請罷師後徵苗兵備邊無不

奉命造釁者遂被劾去璜得褒擢任給事中以母老

乞歸養卒

賈志

兄佩字鳴玉達州學正有經濟才

臨潼志

南軒字叔後渭南人嘉靖甲辰進士除刑部主事改吏

部較京闈試甄拔皆時俊擢四川副使遷山東參議

墨吏望風解綬後以老致仕

賈志

子憲仲字子章萬歷

甲戌進士授棗強令邑城卑薄憲仲修築遂稱保障

抑豪宗發隱盜斷武邑寧晉疑獄利賴甚溥丙子秋

奉檄按邊遍歷紫荆等關凡論斥堠修廢軍餉贏縮

將領賢不肖悉當碩畫以勞卒

渭南志

嚴天祥字叔善朝邑人嘉靖甲辰進士知絳縣絳有毆人股致死者累檢之股骨無他天祥察二股骨形色微異嚴訊之乃吏忤受賕潛易他骨囚具服撫按有疑獄下天祥治之無不得徵拜監察御史

苑洛集

趙仕字丹山膚施人幼負才名與兄瑤嘉靖丙午同舉於鄉知武鄉邑半石田民苦貧瘠仕盡心撫恤清賦均徭懸墾田之令民乃樂業又倡立文社親為訓課

文風丕振致政歸行李蕭然壅殮幾不給

延安府志

張光孝字惟訓華州人嘉靖丙午舉人授西華令剔蠹興利務與民休息西華舊為土城四面受水日就頽圯光孝易以甃三月告竣有王生者為廝養卒所誣臺司已成獄光孝知其誣力出之民大悅服光孝性孝友能文章採華摘藻下筆千言立就著作多行於世子士鵬密雲教諭士鯤沁源令皆以文章德政世

其家

華州志

黃康字思瞻咸寧人嘉靖丁未進士授衛輝府推官時
鄭府以諫忤世宗人乘機誣奏為逆上大怒命三法
司按之法司檄康訊鞠康獨直其寃陞工部主事居
淮上會兵變康通商僭運開屯覈餉吏不敢奸叛軍

帖服陞知彰德府尋致仕

咸寧志

孫一正字格卿渭南人嘉靖癸丑進士授戶部主事歷
遷山西參政駐汾陽時雲朔多驚一正拊民振伍卓
有方畧歷順天府尹振刷綱紀釐剔奸蠹部內肅清

尋以病免一正性貞毅不為威利所移尤篤於孝友

渭南志

琚字成玉一正子萬厯乙未進士授東光令興

利祛蠹調翼城翼城民疲俗悍琚均徭薄賦慈愛有

加擢水部主政慎出納革積弊以勞瘁致疾卒

賈志

孟重字汝器渭南人嘉靖癸丑進士厯固始仁和滑縣

令以才著名累遷懷慶郡守擒盜魁李應乾尋陞河

南叅政分守大梁復以擒巨盜擢僉都御史巡撫上

谷終兵部右侍郎

渭南志

李從教字伯勉同州人嘉靖癸丑進士性重厚質直知涑水縣調歸安時方有倭警從教修水關置邏船倭不敢犯遷戶部主事轉郎中督餉雲中出納惟允陞知河南府改除夔州未發卒

同州志

屠濟興安人嘉靖乙卯舉人任山西長子縣知縣秋毫
不取迨冬著敝鞞無裊民有以屬襪進者正色曰若
墨我叱去官歸親識至以囊錙問捧腹大噓曰官歸
不問官問錙吾豈以錙官耶問者悅服

興安州志

李世達涇陽人嘉靖丙辰進士授戶部主事歷陞僉都御史巡撫山東督漕河以寶應湖險惡歲漂舳艫無算請開越河以殺水勢為百世利晉南吏部尚書甄汰悉當後入為刑部尚書多所平反時權璫勢張甚世達疏先治禁近供事徐正首惡以杜禍源已為左都御史申明憲典俾巡撫無得以問餽相遺一時苞苴盡絕卒謚肅敏

涇陽志

楊兆字夢鏡膚施人嘉靖丙辰進士任紹興知府以卓

異遷密雲叅政著邊功晉都御史巡撫順天嚴烽燧
時訓練陞刑部尚書歷兵部尚書禁衛皆虛籍兆簡
稽不避權貴軍政肅然遴選將士多得其用

延安府志

黃九成字引南城固人嘉靖丙辰進士授戶部主事陞
員外監稅崇文門盡汰溢額以清慎著名尋陞郎中
擁蕪關稅務以餘金充上額二萬陞臨清道副使告

歸賈

志

張士佩字玫父韓城人嘉靖丙辰進士授紹興府推官

擢御史每疏入肅皇輒報可按山東調停海運安輯
遼左流移咸稱碩畫遷守嶺北土寇葉楷作亂士佩
諭散之有盜當三省之交嘯聚百年士佩議立州於
程鄉興寧安遠武平四縣間俾保甲互制盜遂息改
山西參政汾水汎濫沒民田士佩築猪城濬以時蓄
洩遂成腴壤持憲東省齊東數盜者十餘家廉得實
殲厥渠魁盜為之盡晉右藩以水災請除魚臺諸邑
寄養馬匹歲省民財巨萬總晉藩凡所解稅不啓封

即行轉解開府西蜀奉勅大地盡釐隱詭重賦者緣
是得蘇長官司土舍阿祭行萬金賄謀冒襲士佩治
罪不少貸天全司土司楊時春以庶孽謀襲殺應襲
者作亂士佩生擒之永寧宣撫司土婦奢世統爭印
讐殺互奏廉得世統與邊目奢進忠苟合乃暴進忠
罪許自新仍畝以厚賞進宗懼陰為我用世統遂帖
然就勘卒正其罪又董卜烏慮冉維屏稱兵作亂俱
以計討平之成都兵戍威茂監司發行糧稍遲遂鼓

噪士佩急命啓門呼入曰此非副使所得主吾當給之衆遂散致仕歸嘗自誓云吾有三事在官不取贖
鍰遷陟不用賂賄居家不行請託終身不愧斯言

賈志

濠濱撫蜀時有成都同知張元善者亦韓城人土司
構亂元善入幕參贊軍事謀畫周詳論功擢順慶守

聽斷如神發寃釋枉一郡稱治

韓城志

宋承殷字伯賢鳳翔人嘉靖戊午舉人授沔縣諭嚴課
文藝寒士不能婚葬者每周之陞通山令薄賦省刑

有兄弟爭產數年不息諭以大義竟相遜讓有凶豪數不法前令皆姑容之遂為所制承殷至寘於理惡

風遂化

鳳翔縣志

劉時達金州人嘉靖戊午舉人知大竹縣時寇賊嘯聚

達密布方畧捕獲凡二百餘人奸宄至此斂手

四川通志

朱擢字徵庸渭南人嘉靖己未進士授安邑令政在惠

民不阿上官以執法左遷廬州府教授正己率士累擢南戶部主事權稅杭州往司稅者以羨多為能擢

獨減加額尋調戶部主事擁都門稅請託盡絕歷遷員外郎中鄖陽郡太守政務大體戒苛察鄖人尸祝

渭南

志

范燧字以木郃陽人嘉靖己未進士累擢河南叅政居家孝友歷官清約裁推金通滯漕擒妖僧除大猾官轍所經人咸頌之予提宰岳陽有能名

賈志

陝西通志卷五十七上